

غُناہ

17

¹ فر حضرت عیسیٰ اپٹے صحابیاں کی آخیا،
”بیشک ایٹے جہیاں گلاں ہوسن جنہاں
نی وجہ تون لوک غُناہ کرسن، پر اُس بندے پر افسوس!
جس نے ذریعے ایٹے جہیاں گلاں ہوسن۔² اُس بندے
واسطے بہتر آے کہ اُس نے گلے وچ چکئی نا پڑ بائی
کے اسی سمندر وچ سٹیا جائے، جیہڑا کوئی انہاں
لوکاں وچوں جیہڑے مہاڑے پر ایمان آٹنے ان، کُسے
اک کولوں وی غُناہ کروائے۔³ اس واسطے خبردار رہو!
کدے تُساں نے کُسے ایماندار پہراؤ کولوں کوئی غُناہ ہوئی
جائے، تے اسی چنگے طریقے نال سمجھاؤ۔ تے کدے او
توبہ کرے، اسی معاف کری شوڑو۔⁴ بلکہ کدے او دیہاڑی
وچ ست واری وی تُساں نال غُناہ کرے تے او ہر واری اچھی
کے تُساں کولوں مُعافی منگے، اسی لازمی مُعاف کرو۔“

ایمان

5 صحابیوں حضرت عیسیٰ کی آخیا، ”آساں نا ایمان بڑا
کری شوڑو!“ 6 حضرت عیسیٰ جواب دتا، ”کدے تُساں
وچ رائی نے دائے نے برابر وی ایمان ہووے، تے تُساں اس
توتے نے بوٹے کی آخی سکٹے او، ’اتھوں نکلی کے سمندر
وچ لغی جا!‘، تے اے ضرور تُساں نا حکم منسی۔“

مالک تے نوکر نی مثال

7 ”فرض کرو کہ تُساں وچوں کُسه نا نوکر ہل ماری کے
یا پھیڈاں بکریاں چرائی کے اچھے، تے گے تُساں اسی
آخسو، ’اچھی کے فٹا فٹ کھاٹا کھا؟‘ 8 بلکل ناں! بلکہ
تُساں آخسو، ’مہاڑے واسطے کھاٹا تیار کر! تے جس
ویلے تک میں کھاٹے پیٹے دروں فارغ ناں ہونا مہاڑی
خدمت کر، فر اس تون بعد تون کھائی پی سکٹا این۔‘
9 گے خیال اے مالک اپٹے نوکرے نا شکر گزار ہووے
کہ اُس فرمانبرداری کیتی اے؟ بلکل ناں! 10 اس واسطے
تُساں جس ویلے انہاں حکماں نی تعمیل کرو جیہڑے

تُساں کی دتے گئے ان، تے آخیا کرو، ’آساں ناچیز
آں۔ آساں جو کُجھ کیتا، او تے آساں نا فرض سی۔‘

حضرت عیسیٰ کوڑھ نی بیماری آلیاں دساں بندیاں کی شفا دیٹے ان

11 فرِ اسرح ہویا کہ حضرت عیسیٰ یروشلم شہر در جائے
ویلے سامریہ تے گلیل نے علاقیاں نی سرحد اپروں پئے
جائے سن۔ 12 اُتھے اک گراں وچ اُنہاں کی کوڑھ نے
دس مریض ملے، جیہڑے کُجھ فاصلے اپر گھلتے وے
سن۔ 13 اُنہاں اُچی اُچی آوازاں وچ آخیا، ”حضرت عیسیٰ!
آساں اپر رحم کرو!“ 14 حضرت عیسیٰ اُنہاں کی تکی
کے آخیا، ”ہنّ جائی کے مذہبی پیشوانواں کولوں آپے کی
چیک کراؤ کہ تُساں پاک ہوئے ہو یا نی۔“ تے اسرح ہویا
کہ راہ وچ جائیاں جائیاں اُنہاں کی شفاء لبھی گئی۔
15 جیہڑے ویلے اُنہاں وچوں اک کی پتہ لگا کہ اُسی
شفاء لبھی گئی اے، تے او اُچی اُچی آوازاں وچ اللہ
تعالیٰ نی حمد بیان کرنیاں کرنیاں مڑی کے آئی گیا۔

16 اے بندہ، جیہڑا سامریہ قوم وچوں سی، جیہڑے ویلے
 مڑی کرے آیا تے حضرت عیسیٰ نے قدماں وچ ٹہی کرے
 انہاں نا شکر ادا کیتا۔ 17 فر حضرت عیسیٰ لوکوں کولوں
 پُچھیا، ”کیئاں ساریاں دساں کی شفاء نی لبھی؟ باقی
 نو کتھے ان؟“ 18 کرے گل اے کہ اس پر دیسیئے بغیر
 ہور کسے کی توفیق نی لبھی کہ آئی کرے اللہ تعالیٰ نا
 شکر ادا کرے؟“ 19 فر حضرت عیسیٰ اسی آخیا، ”اٹھی
 کرے جا! توں اپڑے ایمان نی وجہ توں ٹھیک ہویا این۔“

اللہ تعالیٰ نی بادشاہی نا اچھٹا

20 اک واری اسرح ہویا کہ فریسی فرقمے نے کجھ لوکاں
 حضرت عیسیٰ کولوں پُچھیا، ”اللہ تعالیٰ نی بادشاہی کدوں
 اچھسی؟“ حضرت عیسیٰ جواب دتا، ”ایئے جہئی کوئی
 نشانی نی، جس توں اللہ تعالیٰ نی بادشاہی نے اچھٹے
 نے ویلے نا پتہ لغے۔ 21 تے لوک اے گل وی نا آخی
 سکسٹ، ’اللہ تعالیٰ نی بادشاہی اتھے موجود اے‘ یا ’اتھے
 موجود اے‘، کیئانکہ او تساں نے درمیان موجود اے۔“

22 فر حضرت عیسیٰ اپٹے صحابیاں کی آخیا، ”او ویلا
 اچھسی جدوں تُساں مہاڑے یعنی ابنِ انسان نے واپس
 اچھٹے آلے اک دیہاڑے کی تکتے نی خواہش کرسو، پر
 تکی ناں سکسو۔ 23 لوک تُساں کی مہاڑے بارے وچ
 اے گل وی آخسٹ، ’او فلاٹی جغہ آئے وے ان!‘ یا ’او
 فلاٹی جغہ آئے وے ان!‘ انہاں نی گلاں اپر یقین ناں کرو
 تے ناں ہی انہاں نے پچھے جاؤ۔ 24 کیئانکہ ابنِ انسان نا
 دُوئی واری اچھٹا اُس آسمانی بجلی نی طرح ہوسی جیہڑی
 آسمان وچ اک پاسیوں چمکٹی اچھٹی اے تے دُوئے
 پاسے تری جاٹی اے۔ 25 پر اس گلے تون پہلے ضروری
 اے اے کہ مکی دکھ تے تکلیفاں لبھن، تے مہاڑے
 زمانے نے لوک مکی رد کرن۔ 26 تے جس طرح حضرت
 نُوح نے زمانے وچ ہویا سی، اُسے طرح ابنِ انسان یعنی
 کہ مہاڑے دُوئی واری اچھٹے نے ویلے ہوسی۔ 27 کیئانکہ
 سیلاب اچھٹے تے سارے لوکاں نے ڈبٹے تون پہلے لوک
 بے غم ہوئی کے کھائے پیئے، تے شادیاں بیاہ کرنے سن،
 اُس دیہاڑے تک کہ حضرت نُوح بیڑی وچ تری گئے۔

28 حضرت لُوط نے زمانے وچ وی اِسے طرح ہویا سی۔
 لوک کھائے پیئے، چیزاں نی خرید و فروخت کرنے،
 راہٹے باہٹے تے کہار باہر پئے بٹائے سن۔²⁹ پر جس
 دیہاڑے حضرت لُوط سدوم شہر کی چھوڑی کے
 تری گئے، تے اللہ تعالیٰ آسمانے وچوں اگی نے لمبے
 پیجھی کے ساریاں لوکاں کی ساڑی پُہنی شوڑیا۔

30 اِسرح ہی ابنِ انسان یعنی کہ مہاڑے دُوئی واری اچھٹے
 نے ویلے وی ہوسی۔³¹ اُس دیہاڑے جیہڑا کوئی اپٹے
 گہرے نی چہت اپر ہووے، اپٹا سامان کہننے واسطے
 تھلے نا اچھے۔ اِسے طرح جیہڑا کوئی باہر باڑی وچ
 کم کرنا ہووے، او وی گہرے در ناں مڑے۔³² حضرت
 لُوط نی بیوی نا واقعہ یاد کرو!³³ جیہڑا کوئی اپٹی جان
 بچائے نی کوشش کرسی، او اُس کولوں ہمیشہ واسطے
 گنوی جاسی۔ پر جیہڑا کوئی اپٹی جان نی پرواہ ناں
 کرسی، او بچی جاسی۔³⁴ اِس واسطے میں تُساں کی
 دستاں آں کہ اُس راتی دو بندے سترے وے ہوسن، تے
 اُنہاں وچوں ہک کی اللہ تعالیٰ آپے کول بُلائی کہنسی

تے دُوئے کی اُتھے ہی چھوڑی دیسی۔³⁵ دو جنائیاں
 چَکّی وِچ پئیاں آٹا پیننیاں ہوسن، تے ہک کی اللہ
 تعالیٰ آپے کول بُلائی کینسی تے دُوئی کی اُتھے ہی
 چھوڑی دیسی۔³⁶ دو بندے باڑی وِچ پئے کم کرنے
 ہوسن، تے اُنہاں وِچوں ہک کی اللہ تعالیٰ آپے کول
 بُلائی کینسی تے دُوئے کی اُتھے ہی چھوڑی دیسی۔“
³⁷ صحابیاں پُچھیا، ”حضور، اے کتھے ہوسی؟“
 حضرت عیسیٰ جواب دتا، ”جِتھے مُرداڑ
 ہووے، اُتھے گرجاں نا جمع ہونا آے وے۔“

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر
کیتا۔ اسان نا دلی مقصد اے کہ اس پیغام کی پھیلا یا جائے۔
اسان خوشی نال عیسیٰ المسیح نے بارے وچ تسان نال گل
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>